

留春草堂詩鈔

留春草堂詩鈔卷三

寧化 伊秉綬 組似

過趙北口

東君一夜渲柳枝黃金界道搖春池析津九十九淀碧西
連瀛莫澄玻璃駿馬如龍上都至騰入湖光飲寒翠銀河
耿耿葭蒼蒼仙侶同舟幾年事

甲辰秋與賓谷過此

蓬壺樓殿烟靄

間大雄小雄浮青山

先皇玉座空雲水當時鴈戶瞻

天顏戰艦猶存望

清蹕波心白羽還如月樂利百年父老心把鋤謂得三冬

雪獨有東華執戟臣攀

髯不及淚沾巾洵知巨浸滋芳甸愁對穠花作好春

春柳詞三首

弱柳得春氣翩翩弄柔枝一枝綰殘月一枝餞斜暉美人
立東風含睇愁芳菲豈伊惜晚晚亦匪傷別離感嘆默無
言卉木何曾知

驅車長安道行行植原古昔臨秋月疎乍遇春風舞映以
清泠淵濯以廉纖雨雙燕憐青眼乃睇飛斜羽日暮小園
情又聽津樓鼓

細草識天心細柳管人情江河不斷綠相送天涯亭

粵東亭名

天涯獨無柳免嘆先秋零永懷小雅材依依是平生

齊河道中二首

朝馳紫陌繡成堆簇簇芳風送蝶來纔歎化工文妙絕杏花開遍白於梅

輕塵浥雨曉疑昏老樹撐空蔽寺門好是齊河城外路遙山青見岱兒孫

登合江樓

落日萬峯低樓闌樹杪齊桂花幾開謝江水自東西野浦漁爭集荒林鳥亂啼曠然懷古者秋草尙萋萋

題夢禪居士

瑛寶

山水與宋芷灣庶常

湘同賦

橫側向背各一峯中有一線風雲通山門了了瞰下界愁
絕九節仙人節左駕龍鼉疊虎豹右俯一片青芙蓉全力
寫山神注水疑動地肺穿龍宮陰陽開闔孰陶鑄筆與元
化爭神功昔曾登岱異此景厥松畧似秦所封客云華嶽
秋露骨目極茲境尋難窮誰能作此夢禪叟追高且園沈
石翁青原居士陰林一亦辦此世人耳食嗤北宗丹青渲染
逞姿媚山石笑倒昌黎公宋家翰林最倜儻是有奇氣於
胷中昨宵寄我蘇研句哦至月落鏗殘鐘逝肯來遊洽幽
賞登堂贊嘆口不容下榻懸圖廣開讌羽觴飛到櫻桃紅

同友人登合江樓次東坡韻

明月雙流一鏡中
憑欄有客話元豐
不虛懸榻來高士
竟坐胡床成老翁
與爾同思武昌夕
問誰能唱大江東
只今惟有磐陀月
曾見神仙作寓公

湖上讌客

準提閣迴孤雲上
倚醉分題忘主賓
小有湖山堪供客
頻來魚鳥亦依人
塔鈴宵語清於磬
海月秋圓白似銀
愛棹輕舟洗心眼
露華湛湛水粼粼

臘月十九東坡生日設祀并送賈生遊瓊州

岷峨古雪凌寒松
星精夜犯磨蝎宮
獨與騷人托性命
越七百載神靈通
昨宵伐鼓泛珠海
清晨白鶴瞻晴峯
焚香

布席開小閣梅花初放春酒濃賓僚偃僂肅瞻拜爲想燕
寢茲廬中子由不來子霞死河車始悟醍醐功豈知長生
原有術不在服食憑孤忠京華往昔爲公壽期早退直印
已封一年一圖再三詠誰與主者蘇齋翁賈生蘇齋門下
士翩然訪我南海東祀公懷公豈獲已仍從僂耳尋遐蹤
見新月

曾是兼旬別悠然見畫檐好風吹帶影喜色上眉尖人已
垂垂老光宜夜夜添徘徊露階下慎勿報更嚴

六如亭二首

金縷餘霞散晚風美人墳傍佛樓東因依玉局三生後縹

紗陽臺一夢中明月有情終到海
慧心無那總歸空
怪他湖水如斯澹
半樹梅花開更紅

文章西蜀水西冷
莫歎浮蹤逐斷萍
影落寒江神與逝
臥聞清磬夢初醒
亭花時散彌天雨
墓草長留特地青
七百年來搜蠹簡
端州磨石爲鐫銘

時補刻東坡所撰墓誌銘

同陰青原宿羅浮華首臺

四百峯棲五百僧
高臺塵世幾人登
日方長至逢仙蝶
林乍踈時見佛燈
魏晉數椽留竈古
海天孤月麗宵澂
前因記取梅花影
紙帳禪房共爾曾

于役高州途中襍詠四首

結束事朝叅簿書苦執掌不如遠行役鳴榔聽清響江水
日以深晴光豁朝朗倚牕擁衾臥青山陪偃仰白露潤我
腸綠水湔我頰况陳古人書故紙得心賞披吟未終冊慙
然念吾黨東樵丹砂明西樵靈芝長百歲詎云遙何方肯
孤往

卸帆羚羊峽碧流松桂陰如何天上雷化作風中琴靜夜
洗雙耳起悟在寸心頂湖汕峙其旁恍列神示森石骨秋
瘦削山氣暮深沉推篷看星斗驚起幽棲禽

孤月孕爲珠七里化爲石旣化仍留精天地空中闢乳源
可泛觴巖洞堪布席巍巍樓觀窺一一尊羈色大江潯梧

來千里滔滔碧到海終有心誰云日將夕

我行何所底將窮南海濱高涼接珠厓實與交趾鄰潢池

警外洋有藪逋逃臣

謂安南阮氏

天公命風伯奮颶除餘氛鳥

焚幕上巢魚遊釜中魂未免風力威遺波及蛋民那惜發
左藏博賑吾民貧茲來暇遊覽到處勤諮詢

朝廷盛德化風雨皆深仁疾苦悉我告我亦耕田人

登電白縣城樓

積水連西極如塵海舶過風高乏鷹隼秋老動鼃鼃銅柱
功猶在樓船議轉訛徘徊思漢將暝色欲沉波

雷州寇司戶祠

海氣南州接大荒樓臺何地廟蒼涼注孤要識心無負夜
水長悲足有創空院落花疑淚蠟野人薦飯感蒸羊漢書
未讀天書進坐惜奇才早擅場

羚羊峽

西江下象郡趨海勢橫猛峻峽樹重關約束在俄頃沿流
曲而駛其氣舒以靜飛鳥不敢鳴琴筑聲合并心源証來
清聞根相與求地脈鬱奇秀叱之似欲逞戢戢跼其羣拳
拳露其頂泉韜綠篠深崖染丹霞靚端溪分一匊寒可鑑
秋影百丈鑿水巖千夫汲脩綆如何割石髓爭入蛟龍境
一手書未工含毫發深省

頂湖山

中歲謝浮念喜與僧爲緣杖策遊名山山靈幸見延元猿
隨我後白鹿導我前疏峯冠霞表幽澗承泉源嶺南詎無
雪飛灑千巖巒想見湖水平山頂涵青天捫蘿窺石鏡俯
壑登雲門中有元棲侶枯坐忘其年但守沈冥理寧假文
字傳谷口尋歸舟夕霽含蒼烟

羊蹄嶺

萬水皆朝宗羣峯各異向盤礴疇肯伏嶙峋若相抗高摩
蒼穹心橫臥滄海上梅銷未到處設險重開嶂谷深鳥翼
迷石怪人面妨下上異晴陰雲泉互激盪策杖右臂廢鞭

馬前足仰茲地昔防倭百粵扼其吭熊羆百萬屯當關一
車兩時清縱無患職守安敢曠崇墉易禦暴積倉艱轉餉
攬勝心躊躇山靈謝無恙

葉花谿丈

廷勳

招集友石齋看牡丹三首

吉祥院與慈恩寺豔藥會聞近佛幢悟到色香無着處白
詩蘇記對吟牕

李白詩邀妃子笑姚黃花損相公名何如綠鬢春長在鏡
裏風光囊底情

省識年芳三月三乍寒乍暖雨香酣東風莫漫嗤貧守看

遍曹南更嶺南

洛陽花事今遜曹
州廿年前曾遊之

過友石齋懷詩人黎二樵

石爲二樵故物

南漢風流盡花開江上村山光連雨斷海氣挾潮昏閱世
桐孫老論交石丈存黎侯香終古瓜蔓隱柴門

寄韓桂舫觀察

故人持使節應上巴陵船曾作浮槎客相思落木天月華
洞庭水蘭氣瀟湘烟我亦踐陳跡驅車到海壖

酬錢裴山學使同年

露下桂華堂珠江片月涼

詔書同武列

昔與裴山扈從澤
同拜典試之

星象逼文昌安得蘭舟

共相於菊酒嘗他時雲閣迴迴鴈落烟蒼

寄吳清夫教授

白雲起羅浮東作豐湖陰冉冉復飛去伴汝滄浪吟滄浪
之水清照見思我心游魚戀舊澤倦鳥懷故林況余入秋
來髮短不勝簪生別但契濶死恨難銷沉維昔與張子孟
進三士稱知音山陽已感笛洛浦空遺衾聞君善名理采
入佛海深寸心有所觸放下同聲瘖我書故人名刻石南
山岑

寄陳仲卿

疊

溟海綠萬古君得明月珠清宵弄秋色獨立顧盼殊顧盼
若有思所思鬱以紆眾鳥夜啁啾見爾真鳳雛鳳雛久不

作梧桐况葉落流聲天外洲樓心雲中閣雙江水悠悠坡
仙之所遊安得懷珠來照耀百尺樓

喜雨和宋吉士二首

百萬窮簷淚翻爲驟雨淋豐荒關國計仁愛本天心已
聽通宵溜還思三日霖東堂銀燭暗枯坐擁重衾

海上密雲布迎曦蜃氣紅誰將雷電力頓使地天通錢鏐
兵銷後田廬

睿慮中周南留太史爲紀黍芃芃

十二日夜雨

喚起阿香事曉行天河挽水瀉江城墻頭幾處移蝸迹隴

上來朝叱犢聲庭院深沉宜夜坐

國家根本在春耕老農勞慰相期早定有桃花柳外明

碣石同袁香亭司馬樹登砲臺

雲外高臺倚碧岑夕陽人散古榕陰長官畧識三倉字石
丈疑橫百衲琴方罽鹵田通海氣如繩戰艦劃天心麻姑
將酒酬風伯一夜鯨鯢卷浪沉時颶風吹沒盜船無算

雙江

渺渺東江江水生西江彌望綠初平江頭月色清如水照
見荷花出水清

七夕

層城遙隔尙居樓半卷珠簾燭影流玉露嬋娟照良夜銀
河清淺作新秋飛飛烏鵲求枝急耿耿黃姑隔渚愁却憶
去年神電衛海天如夢賦瀛洲

罷郡宋吉士招飲湖上

佛火棲禪寺漁歌明月灣竟能來此醉聊爾共君閒忍事
心徒壯憂時鬢早斑妖星照湖水幾處掩柴關

團扇效劉夢得

一年團扇又經秋攜手仙於牆角求來歲承恩清暑殿別
求匹練繡秦樓

九秋感懷四首

蒼狗如雲墮地來何方戲馬許登臺秋心得酒都成淚海
氣搏風總是埃孔雀未知牛有角鴟鴞肯信鳳無猜一官
似帽吹先落空爲生靈哭草萊

宛宛欃槍畫角東由來掃蕩疾惟風魚龍變幻歌筵上驚
鷗縱橫奕局中豈謂封狐猶伏莽漫勞元老壯臨戎可憐
有稻無人穫藉寇秋原雲水空

壁壘依然閭井虛荒榛叢棘若爲鋤占言利執籌神筆豈
不懷歸畏簡書嶺嶠雲屯儲餉日邊城冬暖受降餘封章
奏捷蓬萊殿早有彤弓下玉除

白叟黃童相見時嚴城午夜病支離才非屈子殊慙放望

重臧孫竟不知父老百年驚鼓角羅浮雙岫掩旌旗惟期
去後桐鄉戀屢報豐年慰我思

送謝浣雲旋里

老親禁作詩古佛勸止酒二者既已除兀然負吾友吾友
涉韓江省我兵燹後妖氛照夜赤陣雲壓城黝吾方哭蒼
生有淚不容口千燐飛原草一炬燼屋部長蛇肉可食猛
虎降肯受失前禽不誠奏凱亦顏忸君來倏經旬始剪羊
城韭平生出處心快意數誰某君義誠可感書畫尤可壽
隆冬動歸篷緬想霜雪厚孟光爾所敬阮咸吾有取但積
書娛心何必印懸肘安得歸攸廬及春事南畝

移居番禺寄馮魚山比部

敏昌

忠孝傷心地文章皓首交敢云才與命誰謂漆投膠雨進
林宗饌秋誅宋玉茅願言報夫子惟有淚雙拋

臘月十九日與宋芷灣張賢仲

思齊

伯樹維屏陳仲

卿祀東坡

自是星精降不辰年年祀與感相因子霞夢斷游儋耳涑
水名同冠黨人良夜卜心文字飲荒齋寒盡海天春此時
酣睡軒前鶴應念南圭舊德鄰

爲盧容庵農部

湖

題讀易圖

虞翻昔南遷著書越臺側其挾義畫心畧本慈明易京焦

納甲祕鄭陸交辰息斷斷李資州漢學勤褻績亦越浚儀

生

王氏伯厚

高密如有覲中間王輔與韓康伯襍取莊老釋欲究

十翼微終共八緯斥淵淵洛水清峩峩閩山碧萬古此乾坤
奧竅頓開闢夫君起西江矻矻懔駒隙象非盡鑿空互
變良可藉理非盡決疑樂玩期朝夕當其書告成瑞芝榮
率璣吾生多憂患持守在損益懲忿情必平改過心恒盡
齋居樂玩餘名義上下析泰運狃而安變損已疇昔否利
君子貞之益又安宅轉移那有常震動慎闐寂借問此何
時百卉蒙春澤從君道陰陽章編娛雞蹠

寒食同宋芷灣吉士陰青原上舍登粵秀山次昌黎

寒食日出遊詩韻

我生自信貧非病花朝逢閏春光盛佛桑初發曲池旁團

團火齊玻璃映千山萬山木棉開擊碎珊瑚果誰競波羅

廟古朝霞飛瑣牕獨展玉堂詠

芷灣新作
木棉花詩

玉堂才子與最

豪走讓陰鏗詞義正春半寧知百草蘇歲差那見二月更

已云愛花入骨髓還道將友爲性命承花有鼓苔有岑孰

聯其情執其柄遊益飄雲取次高盍簪於野方爲慶趙州

有靈杯酒澆西方無佛辦香敬一花紅壓粵秀青鐵幹撐

空太孤隻探到薜蘿正則窮享及鷄鵠文仲聖坐看晷景

上花援霸圖安在嗤兼并燕喜西都何足云著書山下原

眞性昨者羅浮罹小劫日暮妖氛風雨橫寒食無人事野
哭沙沉白骨蘆芽迸忍憶豐湖載酒遊花枝姪姪搖圓鏡
天高誰叫閭闔門水滯人玩大夫政田中執禽挾矢疾海
底射蛟伏弩勁和甘只合養嘉禾莫待秋清仍春令

晚登越王臺

招得秦時月來登朝漢臺山川餘霸氣歌舞送雄才朔管
宵城急蠻花秋樹開滔滔歸海水誰信有潮迴

粵秀山禪房小坐和芷灣

南漢呼鑾道今惟鐘梵聞霸殘尊古佛客至坐斜曛花氣
冥如霧江光白似雲晚風吹苦茗松子落紛紛

毛壽君

孫

移寓長壽寺

黃葉城西寺逃名得壽多有情來祕校

謂潘毅
堂舍人

無疾伴維

摩曲沼通潮信疎簾漏月波短筇孤杓外猶記數新荷

次韻酬吳退庵孝廉

瑄二首

雀影柴門暮經過獨爾親靈均敢誰怨曲逆竟長貧忽下

寬仁

詔彌輕報稱身高堂望關塞感激涕揮頻

海水極天碧不知秋月生江湖同跌宕兄弟各聲名頓遣

離懷釋况當公是明一尊酌良夜未忍話歸耕

雙鴈篇

雙鴈復雙鴈依序來相見一聲嘹唳萬重雲對酒燈前聞
色變月明如水浸寒沙沙上蕭蕭蘆荻花一鳴一顧衝風
斜排空有羣迹已久偶影難獨苦相守安心不慕稻梁厚
小者如恭大者友羣魚化雀滄海波鵝鵝鐘鼓饗禮訛黃
鳥移巢避歲惡鴈今不歸將奈何

潘容谷郎中

有度

招集鷗波吟舫

欹枕細泉響洗人方寸心虛堂文字飲良夜管絃音花氣
穿紗出香烟着水沉蕭然不成寐歸夢落遙岑

葉花谿丈招同毛壽君布衣黃芋洲廣文

丹書

呂子

羽山人

翔

雅集鹿門精舍次韻二首

臺榭浸寒綠瀟瀟花竹秋浮雲都入海涼月獨登樓心遙
知魚樂天空想鶴游倚桐高詠者端爲此君留

借問棲人海何如隱鹿門園林忘主客圖史樂朝昏高枕
斯樓最清襟吾道尊疏泉種蘭蕙芳意有根原

尋南園故址

明粵東前後五子觴詠地今祀宋末三忠臣

惆悵南園地秋光共水清君臣三大節詞賦十先生樹古
蟲留跡江空鶴有聲抗風軒上月應爲鑒精誠

題陳仲卿詩草後

太邱有才子於我結新歡寸管驅龍象通身襲芷蘭珠江
天漢落瑤草洞雲寒應念知音者琴懸不自彈

宋芷灣招同黃芋洲呂子羽宿葉雲谷員外夢龍風

滿樓再餞予北歸醉中留別

五人襍被空堂宿蕭蕭夜雨桐心竹名地縱飲高歌海舶驚
滿樓燈影搖寒綠丈夫未了民物憂安能射虎南山頭手
挽銀河摘珠斗凌空長嘯海天秋

附送別詩

宋湘

風波生別離艱貞定憂患君行具舟楫我心指葭蘼事
畏從頭說意切方來盼思歸聊爾歸得宦亦當宦欲語
心萬端一口木得串

君當別有言出處理爲商知君徘徊意轉我友朋腸竟

夕不能寐此計知誰長俗人慕官爵志士念顯揚願公
思復思忠孝亦未妨

君恩重如此父德何可言公學旣有效遺愛在元元平
生事讀書豈必高邱樊輾轉復輾轉慎勿薄軒冕倘不
知公深未用輕勸勉

別離不足道會合何能忘人生所交游寤寐能具詳此
事關道義不獨在文章惟公知我真惟公容我狂念此
復惘惘湖之水泱泱

湖水復何如公亦去之久我每過惠州不敢重迴首惠
人昨日來思公只如母非我實媚公父老祝我口公平

當復來椎牛醺村酒

寄韓聽秋孝廉

如縷情絲視肯休

開其方有目疾

未驚明鏡雪盈頭此身暫掣寰

中電往事聊同水上漚一寸心通千里月八關齋閣小山

秋吳閶歌管繁華甚獨守淵元挽末流

夜宿清遠峽口次晨遊峽山寺三首

山靈掩華月杳冥如可談人定水自明石壁翻澄潭張燈
潭上宿蛟龍視耿耿夜半雷雨作溱神遷而南洗出幾蓮
花霜天送青愁輾轉待鷄鳴孤艇穿晨嵐

曉晴歌黃竹披雲謁帝子軒轅誠渺茫紺宇蕭梁起穹殿

蒲牢鳴聲宏應波底孤亭山半危承泉架石齒萬石破水
聲水花織羅綺榕根上天梯拄藤從此始

萬古不飛去而乃信飛來當其飛來時潮避天門開離奇
到松竹縹緲仍樓臺後枕庾嶺屏前酌滄海杯禹君乘秋
月曾駕雌鸞回

中宿峽

別海罷潮汐入峽兼陰晴陰積太古氣晴見翹峯明崖懸
葉墜間枯木無風鳴無風動客愁况乃西風生百口寄片
竹飛纜驅猿行兩岸神虎迹六時子規聲忠信苟不虧履
險只如平息慮聽波響庶幾聞咸英

滇陽峽

滇水源雄州涓涓明清瀨蒼峽屢激之滇怒波瀾大山骨
本峻厲使水甚矣太安得灣環行面面樵風會風利亦奚
爲坐失翹峯最不如飽看山遲舟壓青靄

英德縣

玲瓏琢天巧俶詭徵山靈斗城置石中妨面芙蓉青定知
飛上天一一皆華星奇峯詫雄武側諦殊娉婷前後左右
顧變幻無定形而況千百峯疇限女媧型我未具袍笏舉
觴不能醒似聞縹緲處乘月來雲駟

觀音巖

精衛欲填海遺石天南陬波濤齧其根微罅棲縑流如燕
幕鳩巢久思招提游過客獨驚異兼有無窮求豈知補陀
山三島環十洲又環大瀛海身世真浮漚何小不喻大齊
物良有由方學寒蟬鳴天風響颼颼

度嶺喜晤吳白庵廣文

照

嶺南海氣昏如霧嶺上梅開三百樹雪香策蹇不回頭橫
浦故人欣道故延陵仲子曠世才語襍悲喜神爲哈鵲溪
之絹爲我裁剡溪之酒爲我開銀漢西斜日東上對弄柔
翰傾金罍玉山欲頽五嶽羣君似奇書不厭讀從來骨鯁
宜臺垣何事蕭疎寄盤谷曾都轉賓谷畢尙書秋帆緇衣之好

平生無黃山白雲成海水中丞報書又知已

阿雨總中丞聘爲徽州山

長明日去官如脫屣交君廿年心早降廿年幾夜挑銀釭

同舟且泛芙蓉江

懷故友李虛谷編修

如筠

關路正蕭瑟况聞鄰笛哀英姿悲短李微雨灑寒梅詞賦
千秋筆風雲七尺隸如何題片石遽上嶺崔嵬

章石樓同年

學濂

昔贈白庵畫蘭長卷舟中與白庵

檢閱愴然時石樓下世二年矣

芙蓉江上雨同聽化鶴人今入杳冥爲問廿年濡墨客鬢

絲可似畫蘭青

雨夜泊彭澤

風雨冥濛夕江山浙瀝秋似聞河伯歎未解小姑愁

小姑山名

晉縣燈明郭吳船笛倚樓堂堂方斷事欲挽水東流

明方伯通

先生官四川斷事靖難殉節於華陽鎮被江死鎮昔屬彭澤

文信國琴

琴有字日夜宿青原寺聞召譜一闕

海水有時盡此琴無限情殘宵宗國慮餘響暑天清譜借

青原寺傳同玉帶生千秋桐不朽誰奏兩三聲

揚州喜晤吳穀人王鐵夫曾賓谷金手山樂蓮裳江

鄭堂

潘

袁壽階

廷構

諸君

細雨廣陵權餘寒芍藥天故人嗟再見小劫語難宣親老

仍求祿

君仁罷戍邊瘡痍猶未復把盞淚潛然

附贈詩

曾燠

他時已分遠離羣拭淚今朝又見君拙宦自應登白簡
故人多得上青雲客中身是朝廷賜夢裏家仍嶺嶠
分猶有深情憐我老十年鬢雪便紛紛

諸君爲余置酒湖上餞別

逐臣赴

闕艤江船婪尾芳尊近管絃消却故人多少淚塞垣明月
廣陵烟

附贈詩

金學蓮

十年幾度看花客不愛花紅愛花白詩中知己兩三人
酒裏濃香一千尺連朝絲竹紛繁華年盛意空天涯
去年今日那可說零落不獨將離花可憐花尙如人面
宛轉春歸不相見寓公今作惱公看走馬西郊淚如霰
太守無家今落魄朋舊如雲各珍惜夢中宦跡嶺南遙
蛋雨蠻烟漲天黑看君不飲心自悲坐令綠髮成白絲
羅浮梅花無一樹何況揚州金帶圍我聞此語三歎息
自掃苔痕臥花國扁舟如葉下江南蘋綠汀州歸不得
昔年花下放嬋娟始信好詩如好色不然桃李已成蹊

啞啞歸鴉終日啼連天風雨復如晦湖上柳陰空綠堤
途遇韓桂舫臬使同用聽雨詩韻

邂逅重逢歲幾更班荆同飯古郊城又分鴻雪東西印虛
負雲龍上下情直道艱難嗤展氏故交零落嘆龔生萋萋
芳草春洲長鷓鴣終宵漫發聲

附和詩

韓 封

自得君詩歲九更每來棖觸楚王城時過信陽將之長沙夢尋蕉
鹿皆陳跡影斷江鴻獨愴情一昨紅橋揮淚別幾回明
月應潮生也應憶著南遊客聽遍千山杜宇聲

贈孫淵如觀察

聖人前席魯人思喜見春風節再持官近先師三月治家

承王母九旬慈

淵如祖母九十八歲

中原霖雨資青岱上第祥雲憶

玉墀聞道轉輸趨左輔書生籌

國鬢如絲

王卜崖給諫

鍾健

少孤承其先世父明經君之訓以

至成人庭前有棗樹婆娑老矣追念作圖同人題詩

以紀之

棗樹纂纂園中花吹香望實今如瓜行人指點王給事閉

門老榦空杈枒維木有本感世父經傳劉向詩侯芭梧桐

初生阿閣曙鳳皇天上聽匏媧黃門一疏表舊德

特頒牙繡紆青綢祇今白髮念孤露千回上樹緣枝斜多情桑梓能啟我四十年夢猶東華歸視松楸兼護棗匪云譽樹韓宣嘉

題自畫山水

論詩欲叅禪學書可通畫或勸姑爲之湯許遂成債本味六八法兩謝南北派大宮與小霍元氣轉光怪潭深隱魚雷磴疊懸鹿砦翹峯倘可陟吾將謝流輩

檢篋得昔在西省蒙

恩賜扇及荷包恭紀二首

端午仁風被小臣泥金官扇細裁筠十年啟篋雙垂淚曾

荷南薰近

聖人

金縷新鶯脫壳黃已叨筠扇更荷囊趨庭猶話承
恩日深結習前出建章

留春草堂詩鈔卷四

寧化 伊秉綬 組似

大興相國師澄懷園直廬有灰色鶴自至馴若素養
紀詩二首

鶴壽不知紀翩飛到上林鏡中閒照影天外遠流音何處
無奇樹於茲託異岑色灰塵詎染最愜老人心

道妙少人會秋空若見招暫來陪杖履終待控雲霄異服
浴黔半仙胎神理超此間鄰上界延頸聽咸韶

李墨莊舍人出示冊使琉球歸槎圖卷率題其後

聖皇嗣服覃化醴深仁漸被東海東休論荷蘭嘆咭喇扶

餘日本兼朱蒙維東南洋中山國琉球大小歌駿龐我昔
鼓山眺絕島黑子兩點浮青銅海濤翻天天風急欲踏銀
漢凌秋空周禮崇祀保小寡吏報鯁至輸誠忠其王卽世
世子天世孫籲請

天朝封

大皇帝咨禮臣奏慎簡使者憑

天衷李侯星精峩睂秀誦詩三百千夫雄鳳皇初鳴阿閣
曙麒麟服出

乾清宮龍旂虎節頒冊命元纁拒鬯珪璋琮司空飭工駕
樓櫓司馬檄衛煩軍戎澹螺養水暮天碧老蛟驅浪晨霞

紅免朝牌掛百靈助十六年夢奇遭逢

墨莊昔夢浮海巨觴金牌大書免朝

二字今果驗

使者從天降那霸

琉球地名

天橋綵壓城頭虹藩王負

弩俯道左舉國角稽蠻樂從禮成辭饗却投贈宣示

德意三呼嵩漢家羈縻今洽髓

御書再建樓穹窿表文金葉詩楮葉欲詛譯館詩文同槎

回梅花洋水靜一一指點來時蹤北堂喜進陸賈酒西域

嗤紀張騫功歡斯氏裔最恭順

定鼎初元來旅寶汪

楫林

麟焄

徐

葆光

周

煌

遞奉使坊傳

守禮胥華風君偕充國

謂正使趙介山修撰

更利涉紀載國俗傳無

窮

盛朝柔遠遠人至交趾又遣陪臣通

題查小山鴛鴦吟社卷後

七年再到長安道惟有荷花顏不老元都觀裏花亦開看
花歧路空徘徊故人館我縹雲館憐我風濤來偃蹇剪紙
爲招杜老魂撫琴重聽廣陵散亦知微物皇天慈高堂垂
白心南馳此身不化爲猿鶴鵲行容綴猶然疑故人心似
雨餘月沁人肌骨鑒毛髮却憶曼卿蜀道難石琢明誠金
石隨狂瀾趙味辛覆舟於淮祭酒酒戶非昔寬吳穀飲我邛上春
將殘今人題詩後人看以今視昔已改觀喜君瀟灑顏渥
丹賢豪聚處亦已艱不經憂患寧知歡竟須苦留張檢討

船山 日日醉倒眠蒲團

爲陳石士編修用光題瘦石圖

在地爲石天爲星其形則石神則靈中藏爲玉外爲石璞
闡其文乃其德巖巖非大拳非小瘦骨撐天天不老鎮壓
地軸地所寶滄海有時變桑田幾見砥柱東西倒公子命
名抑何早結根閩苑尤堅好立朝節槩黃幼元不然白沙
講學終嶺表

明陳憲章黃道周
二先生皆號石齋

同時帆蘭士遊萬綠莊

孤約橫秋水城闌載酒來殘荷猶畫舫高柳出平臺塔指
尉遲建

有唐尉遲敬德題名

園疑希憲開亂蟬將落日又遣管絃催

爲翁覃溪先生題黎美周芳草詩卷

後有徐子能等和作

天涯香草懷君子勝國名花作狀元一種芳情遙矚處海風吹月到南園

譚藝江東徐子能春風裁賦得三朋何如善眼蘇齋老一證訶林最上乘

爲張玄白孝廉題渡海圖

生長海邦未見海宦遊乃從絕島觀不知包絡尙有地惟恐穹宇難爲寬天開甲子石齒齒神電返照鷄籠山江萍

安南地名

荏苒參阮氏樓船載士強弓彎此時有景誰能賦嗟

彼蛋戶罹憂患馮夷震怒颶風發鯨鯢淨掃蛟鼉翻焚香

夜禱波羅廟孤亭浴日肌骨寒披圖但見五色水不須向
若增長歎君從岷峨泛瓊星河倒影手可捫神仙排雲
沓笙鶴中原一抹青山痕人生快意孰過此那怪下筆銀
濤奔况君雅興無與倫讀書懷古思其人鄉賢廣詢東坡
宅故老更訪剛峯孫

重陽前一日同楊蓉裳農部

芳燦

法時帆張船山何

蘭士遊棗花寺訪菊

未落蕭蕭木猶疑纂纂花禪心除酒定菊信待霜葩讀書

王朱對

寺藏紅杏青松卷
有漁洋竹垞題句

題名歲月賒仍招二三子歸去

醉鄰家

題朱素人本畫

雙松盤側嶺嶺半陰晴分幽澗澹秋色上方多白雲乍探
奇所見獨往靜生聞一杖晞吾久蒼茫拄夕曛

爲吳荷屋編修

榮光

題文與可畫竹

鄰家風壓竹過牆晴窓蕭瑟搖秋光欲攀鳳尾不敢捉葉
底寸寸針鋒藏薊門幾見竹竿長七百年墨餘真香大書
巴郡文與可豈惟畫絕書亦頗趙家淇澳不自保千畝湖
州尙完好三絲續絹今已無何須欸字題髯蘇文竹多蘇題欸

題蘇齋所藏東坡真蹟次韻九首

東坡書蔡君謨夢中詩及陳述古閣中舊題並周

韶落籍詩元虞伯生見於柯敬仲所爲賦四首敬
仲乃盡和卷中韻爲九首其後倪迂馬治張雨皆
和如其數乾隆壬寅歲覃溪翁先生視學粵東購
得之因以名齋常示客索和

一夢偶然留斷句蘇端明與蔡端明如何恂恍迷離境啟
我尊前望古情

錢塘官閣何人筆檢韻同時並和尖至竟閒愁消不得新
潮更比舊潮添

堂堂歲月壯心驚休說文章躡鳳翎濕却青衫燒盡蠟玉
顏端合誦金經

湖水如藍酒盞紅清歌難得靚韶同禪心欲作羅浮夢萬
樹梅開一夜風

濰州驛雪淨離塵往事閒追門草春曾弔六如亭畔月故
知多慧是杭人

奎章學士來西蜀同泛丹邱書畫船留得髯蘇情種在新
詩都愛古嬋娟

卷端妙墨失涪翁環慶堂開暝雨風誰迓坡仙來使院毫

光夜夜起齋中

原有山谷
跋今不存

烏雲含雨愴吟魂篇翰流傳夢裏論我亦曳緋來嶺海酒
痕多處帶啼痕

寶蘇室內屏風石畫手荆關未足誇

先生近得靈壁石其文恰肖烏雲紅日之

景解得墨緣真宰結未妨愛水蕩恒沙

作惠州白鶴峯圖裝於蘇齋施顧注卷內

鶴峯東峙鷺城西雙江橫掠仙禽飛三年與公對衡字倘
識隔世方南圭木棉高花堆火齊鐵榦撐石開烟扉華表
崢嶸插霄漢公尙酣睡聽荒鷄以思攝思水洗水子霞自
臥豐湖湄有鄰堂春酌美酒翟秀才近呼東籬我倚孤亭
看落日直至月落明星稀英靈不隔餉一研

曾修公祠於沼中得公故

研似與叔黨同扶藜夜汲井水冷沁骨并銘片石從何稽

作圖好寄寶蘇室附諸宋槩施箋詩

題衡方碑陰同覃溪先生寄桂未谷大令

盛漢富文藻罕載書碑名禮器金鄉師但云七人成華山

之郭香察書義甚明粵惟建寧年二頌標厥稱西狹仇靖

創鄴閣仇紉仍然而不始此始諸衛尉卿尉卿垂貞石輝

映汶水清千有六百年其陰委榛荆好事推黃九小松搜司馬

出方瑤瓊會稽有故吏任穎多門生借問書者誰朱氏其

名登歐趙所未見見之適然驚熟碑最新拓笑倒翁北平

最熟之碑最新拓覃溪丈詩句因思桂大令南詔烟嵐蒸亦復念賤子未

必來都京未谷寄蘇齋書有云墨卿想未來京豈知聲相應勝賞同挑燈維

衡與伊氏同祖商阿衡似憲貧非病學由聞斯行用碑賤中句

子竊慕之百本臨摹會臨書何足道陰出疑神靈據陰考
書家於以知樂陵滇雲逝油油春鳥鳴嚶嚶送君長安陌
六十纔稱觥十年君老矣應夢東山青請以樂石壽千觴
計猶能

爲錢裴山同年題使蜀卷三首

分蜀棧蜀江二圖

蜀道青天險憑誰寫驛程文昌華省客使節錦官城地界
雍梁會身高參井平題名登劍閣定有候星迎

白帝城樓峻黃牛狹路斜持衡來百粵伐鼓下三巴罔兩
棲林葉魚龍卷浪花猿啼休日夜銜

命不思家

省春草堂詩金卷四

忝附春卿籍同掄秋賦才

予登泰山之榜又幾年
同日蒙恩出使

弓劍慕一夕畫圖開臘雪分吟席江梅映酒盃故人天共
遠難得瑣牕陪

姚秋農學使

文田

拓九曜題名附陳恭甫編修

壽祺

荔峯學士

嵩慶

使車來京次翁覃溪先生韻二首

清池涼散七榕陰亭館蕭閒話雨深澹墨書留星曜影虛
堂人聽海潮音秋高玉尺乘槎望日暮珠江載酒心却憶
前塵仙侶接匆匆分袂總訶林

前年恭甫去年秋
農俱別於海幢寺

芳洲瑤草入春繁潤借廉泉見本原樂石盡收洪适志苦
心還奏賈山言九星落地初無字五子吟詩尙有園話到

漁洋嘉樹譽雪牕茗枕試重論

十二月十九日蘇齋拜東坡眞像三首

梅花一夜白載酒升公堂公逝七百年酒熟思公嘗歲事
薦水藻鶴峯明斜陽誦公生日詩肇始惠與黃惠州曾幾
年我亦風濤傷孤亭紫翠中迴首雲蒼涼

番禺蕭寺柏鐵榦風霜苦隙駒閱斯辰艱虞但懷古我友
朱翰林註裁詩力如虎招來三秀才各各攜酒脯打門拜
公像我仍爲之主往事戒弗言歡呼動衡宇而我更清狂
醉持蕉竿舞古人不可作今人隔風雨

我我寶蘇齋篇翰精靈寄歸來塞北翁別齋已三歲遂招

玉堂客羣偕曙鴉至豈惟妙墨存兼有真像秘頰瘦畧芟
髯顴脩更添誌溯諸龍眠本可證陵川記山谷若見之定
謂倚石醉欲幻百真形微叅當禪偈天青雲白間神仙倘
游戲

花朝次韻寄酬葉花谿丈

鳳城鶯語破輕寒試馬宜從九陌看歸鴈帶將春信早疎
鐘聽到雨聲乾空江酒泛鶯同色二月花開粉作團爲報
荔枝灣上客相思北斗正闌干

題邊城插柳圖送張子白

若采

回任鎮菴

張侯爾盡一杯酒好向邊城插楊柳柳色依依二月中蘆

溝萬里休回首西風天馬入蕭關老樹荒原未可攀邊吏
精神酒泉郡詩人藻耀胭脂山三年報最長安道棠舍猶
思長官好入廐寧知馬似芊浚渠早獲蟬鳴稻流沙誰識
水泉甘未老桓公感漢南卽看蘇武祠前月萬縷搖風色
勝藍

送何蘭士出守寧夏

君不見賀蘭山高高接天柳枝紅似珊瑚鞭君不見黃河
流過鳴沙東神龍峽口磨青銅其源盈尺桃花水急報雍
梁一千里我欲山頭築成戲馬臺倒傾黃河入酒杯受降
西城盡蠻服蕭關東道來龍媒使君五馬一馬驄初銜

恩命蓬萊宮漢唐弧矢防邊處

聖朝耕鑿屯田功屯田有年多秬秠地大物博風漸靡稚
牛擊鼓吹笙竽紅氍毹照吳姝美使君稱詩魏與唐土風
好樂思無荒方今都護所隸疆葡萄苜蓿走且僵有不庭
者鞭遐荒我歌此詩告邊吏雪勵精神風作氣馬騰士歌
盡地力慎守封圻千萬世

次韻酬宋芷灣三首時將出都

塵凝琴薦酒翻杯隔歲懷書首重回薊北近來都少雪嶺
頭昨夜定開梅翹材馬臥留賓館落日烏棲避債臺聊縱
思親懷友目雲如車蓋自南來

春半山公一疏題劇憐名姓

聖人知拙將勤補原身許話到

恩深只淚垂鴻鴈宵鳴淮上賑鯨鯢秋老海中師又分民
事酬良執消得元家愁苦詩

吾生荒落強名儒子玉垂銘置座隅百斛珠誰搖筆集一

條冰倘換銜無

芷灣應來散館

隔江沽酒逢僧住侵夜看花待月

俱爲報黃塵馳九軌車箱簾影漾蝦鬚

附原作

近到京華醉幾杯州民抵死盼公回傳聞首路當新歲
及見汾江是早梅曉夜嘶風原代馬古今相骨只燕臺

故人多少樽前舞定道石尤吹得來

莫把羅浮舊事題好官原在路人知疆場有福兵纔戰
草木無情淚久垂近日獨愁春甚雨狂波難得海班師
山人寂掩重關坐不爲先生不寄詩

若復關心問腐儒年來粥鉢到城隅諸侯青眼今才有
老婦紅粧昔久無看少木棉忙可想栽多籜竹瘦應俱
憑君寄語同袍侶向日狂生已白鬚

夜半過趙北口

澤國明月曙芳心寄清光一片碧玻璃中有潛蛟藏百蟲
響斷絕神魚跳中央瀛莫應天池沽淀餘津梁三家兩家

邨燈火時漁莊十里五里堤羸馬隨鷗翔昔游感搖落寒
渚傾斜陽茲排金銀臺洲島窮微茫凜乎難久留沾袂雲
蒼涼

爲吳柳門孝廉題香雪山莊圖

詩人例愛梅非爲百花頭上開亦非數點窮根荳清入心
脾寒到骨氣味要與吾儕一石有情兮鐵有姿長卿才兼
子卿節巖高暑短苦幽獨影落寒泉照孤月豪門縱買百
本看尊彝作配情先隔無心求豔神理超隴頭欲寄思爲
勞松風亭下兩株玉南遷坡老吟魂銷黃山君有三間屋
笑我汀南虛卜築

家君昔畫梅花書屋
卷一時題者甚衆

山中白雲成海水

乃今香雪亦如此歸歟著書臥不起

渡江

古堞南徐鎮高牙北府兵石留雙劍迹江帶六朝聲白酒
能消恨紅船號救生岷峨千里浪到海自然平

對月懷葉雲谷戶部

君似一輪月遙天只獨看光依丹鳳闕清鑒白鷺灘

南海地名

往歲輸心印高樓坐夜闌餘輝如可接誰道隔雲端

昔在嶺南聞稚存編修遠戍黯然有作今讀其荷戈

集載題集後

龍沙萬里本

君恩況未經年入玉門絕域擬收韓愈骨

深宮重繹賈山言羌回曉舞聽

明詔魑魅宵愁放旅魂我亦荷戈叨

曲赦撫膺圖報更兒孫

秉綬前會請戍軍臺特蒙聖恩昭雪免行

秦郵喜遇同年閭隸園觀察學淳飲於夏氏園亭

西省前塵憶共游十年清夢落揚州時人爭比王司理夙
世原知李鄴侯臺畔客星淮海宅酒邊明月鏡湖秋若將
絲竹供陶寫草草應須五日留

熊介茲員外

方受

與雨堂侍郎

恩溥

在閩合寫竹陰

消夏小照介茲過邗上屬題時雨堂已下世矣

海濱盛暑多種竹好風時作鸞鳳鳴神仙對坐意瀟灑恍
似磚影移柯亭簫材依然笛聲感一仙已愴山陽情閩山
巉巖嘯罷虎吏習文弱彌縱橫使者持節小部勒胷中兵
甲消猙獰從來儒臣第校士詎解除暴援蒼生至今邊人
每借問司馬何不爲中丞譽我於朝闕一見太息任重
斯人勝君今盛年趨禁闥勁節一夜層霄凌武公德如
藁竹懋吉甫頌比清風清而我臥閣豈能理但叅玉版同
枯僧長夏先將歲寒勛此君索句三人盟

東堂

槐影橫階畫戟圍東堂晝靜報書稀頻添沈屑誰爲伴石

丈清瀣梔子肥

詩僧小石

了學

寄居隆慶寺有古樹二同年阮芸臺

中丞易名雙樹庵

紅橋跨綺麗古刹背流水門閉綠陰中磬聲度殘暑蒼蒼
雙樹存陣陣油雲委荒階積蘚封老鸛因風起白足乃吾
黨嘉名緣汝始寧須侍者侍孤研對塵几行庵繪湖邊得
句傳城裏約我芟荷香夜坐譚名理

贈尤水邨

蔭

眞州城東社吾愛尤水邨據鞍思塞北絕裾辭王門歸坐
一庭竹亦復將黃昏手寫奇石紋身如枯樹根簾垂茶味

求所得在忘言

贈李瘦仙

天徵

不婚亦不宦肯來踏青莎燈紅梅花白寒夜曾婆娑借問
何所住僧院西鄰家貌臞筆乃健霞散羣星羅逍遙履長
羸裳敝希新荷

湘靈峯歌

眞州西郊有奇石本明汪氏園林康熙間陸中吉
先生官斯土厭游客自稱守門長吏毀園而石存
同年阮中丞物色得之易名湘靈峯尤水邨布衣
繪圖焉

君不見石家金谷荒榛莽廉吏羞爲守門長至今零落美人峯天寒倚竹竿三兩當時河伯閱雲鬢千牛輓出洪濤間玲瓏骨照海門月窈窕秀奪江南山老閱滄桑奈何許聽殘歌管瀟瀟雨歛見名卿剔蘚痕又聞高士能寫眞石若有情應顧影嗟爾悠悠世上人

阮伯元中丞以楊忠愍公書藏之焦山

深宮青詞媚奸佞絕徼陰雨愁孤忠積霾翳空不見日猶望杲杲當天中涕零和墨走蛇蚓心苦舉義追龍逢自言戍所乏佳紙神物乃護傳無窮九螺浮烟漢隱洞東瞻滄海西岷江於斯安靈兼寶墨定有雲氣凌青空公同荆川

渡揚子談兵檢韻意氣雄茲讀詩騷懷俊彥

卷中有鳳洲
繼津諸公名

如張廣樂開子聾中丞寶此良有以欲使頑儒聞其風三代鼎摩蟲篆古六朝碑拓鶴夢狎同藏茲山作砥柱不與江水俱流東

白將軍歌

將軍名雲上河南人由侍衛出爲揚州遊擊桂林陳文恭公撫吳時曾薦之歷官副將今祀名宦祠
令子藏文恭簡札索題

九原欲作隨武子嗟白將軍何遽死名存學語小兒口饗配揚州瞽宗祀求忠於孝維本根將軍以勇娛其親將軍

之勇將軍仁大臣能以人事君當時相公陳榕門講求典禮遺書存將軍死後民益苦海有蛟鼉陸豺虎

至尊宵旰獨思艱邇日臣工果誰補將軍佑我蕪城安馮夷肆虐方爲患眼前有民不能愛佗日何人念下官

送閻糴園觀察北上

紅樹蕭疎點薊門禁鐘聽盡耀朝暎朝

天又踐尙書履

浩持尊甫會爲大司空

話雨同依古佛旛風勁歌驪

彌繾綣酒醒聞鴈易黃昏白雲樓迴如登眺壁上曾留醉

墨痕

題澹志詩草送童牧謙徵君

積超歸里

弱冠求友生早得童牧謙叩之經籍富益我直諒兼歸語

吳

清夫教授

與張

孟詞進士

二子交親咸別幾三十年君果舉孝廉

借問舉主誰中丞斗山瞻

汪稼門先生

君從中丞來出卷俾題

籤乃令祖遺詩舊德彰幽潛述著雖不多亦足平生覘吾

鄉稱先詰麗澤雷童占

雷翠庭童寒泉兩先生

欲挽百川東真接吾

道南令祖濡緒論詒訓衾影嚴君勤明發思鳥雛語誦誦

桂樹小山白蘭膳清風含贈言各努力晚節古所矜

荷花塘

哀鴈澤中影洪湖天上聲草根明滅火釜底四三城天意

寧論命臣心或匪誠仍煩

宵旰慮連歲

軫災情

附

洪亮吉

淮海維揚屢告災
晴天白日浪成雷
居民僅免爲魚苦
長吏能歌旅鴈哀
積貯幾年隨水盡
流亡分日渡江來
春陵詩與監門畫
忍爲遺黎讀百回

姚堤

萬里昆侖水何爲
西逝波幕天皆赤子
橫地走黃河愁絕
秋風起休言夏麥多
看頒十行

詔奠汝泰山阿

崇家灣

嗚咽潮東釜底州老農懸耒四年休只言賈讓謀堪用獨
使監門淚暗流風雨冥冥魚媵夜星河歷歷鴈賓秋幾多
婦子聞嘹唳羨爾南征得自由

黃孝子詩

鎮洋彭甘亭索題
事載鎮洋縣志

康熙年間黃孝子求醫執役尋常事孝莫大於感鬼神鬼
神雖遠惟德親母病籲天臂刺血血書一化痊哽噎嘻嘻
出出災及廬撫棺狂叫身焚如身棺同灰誓不怕祝融乃
返之鄰舍匹夫一念通天誠性爲至性情至情孝子黃姓
聖猷名百餘年事猶英英嗟我有親未能愛作孝子詩汗

浹背

秋夜

三十六湖水東連海氣蒸觀民如病鶴顧影是枯僧月色
難禁簾蟲聲愛近燈此時籌補救安敢信吾能

賑災四首

乙丑歲秉綬忝守揚州值七屬水災次年尤甚蓋
自甲子已來疊溺三載冬麥未種哀鴻嗷嗷賑金
無算惟有身歷面稽見吏有侵漁者矢鷹鷂之逐
而已紀詩無文惟以告哀

灌水入蟻穴亦有芥渡升堂坳二州五縣民安能懸耒三

卷之五 詩集 七
載衝波濤河伯不仁風伯怒終朝噫氣欲拔樹可憐樹葉
盡充糧釜飢上屋舟入房房中白髮翁與姥恨非少壯能
逃荒一沾

皇仁淚如雨邨得貨布成酒漿

城中履繁霜城外滔滔無草黃昔時墜戶入室處祇今舍
作鼃鼃藏鼃鼃慎毋久窟宅中有先人之白骨

鴈鷗叫月江楓殷忍見白浪來排山北不開雲梯關東不
關關龍港馮夷驅人作螺蚌豐年餓死海陵倉有水無土
天茫茫鬻子負鹽過江竄老兵得之擬城旦

種麥種麥婦子忙臨流一痛沾衣裳眼前半菽不能飽遑

計將享以飭嘗去年典牛幸未贖羨爾得生且生犢吁嗟
算口授官糧鰥生自愧爲民牧

附

林鎬

清晨發邗溝薄暮趨秦郵西風獵獵吹小舟長年牽纜
行且謳舟中兀坐者誰歟揚州太守查災黎災黎走相
告是爲太守心竊疑往年太守查災來樓船萬斛聲喧
廛荒村索鷄豕破屋科錢財上食太守供輿臺敲扑丁
役令心哀苦若巨浸重爲災今年太守胡爲爾從者三
人兩人耳村墟歷皆遍風霜行未已父老語災黎爾輩
焉得知揚州太守今姓伊政聲久從粵海馳江南大府

告

天子命典名郡初來茲昨聞太守出府時髯奴悻悻前
致詞官今領大郡出入須威儀前船載輿馬後船列旌
旗驛路設供帳州邑爭餽遺旣得飽胥隸兼足充囊資
太守語髯奴爾言何可鄙我昔被

命來儼星河之涘時當夏秋交暑酷汗如洗買舟小如
甕出入波浪裏飢咽脫粟飯渴飲濁流水災區幸周贍
遑自恤勞止何況綰郡符其痛受如已儻從人苟多約
束法難恃豈維索酒食且復營賂賄官吏一頓餐民將
竭膏髓官吏一囊金民將鬻妻子哀鴻方嗷嗷忍令更

出此飛符下州邑諄諄戒令史慎勿役丁夫辛苦負行
李慎勿具盤殮殷勤奉芳旨水減民未耕先爲理疆址
歲晏民未食先爲謀拒糝強梁禁侵暴羸弱捄轉徙繪
取流民圖鄭俠本鄉里行見賑澤施庶免溝壑委災
黎聞此言感歎同一聲扶挈老與幼遠近紛相迎爭先
望顏色愛戴逾所生翻愁水涸災沴息太守不向村中
行

爲屠琴隲孝廉題拂塵庵圖

孝廉與查梅史胡秋白
范小湖及積堂讀書處

氣合苔岑闢草萊樓牕面面向江開精藍真絕纖塵拂當
代誰如五子才古柏經秋支石瘦好風吹月湧濤來狂歌

醉舞消良夜何暇同僧話劫灰

題韓桂舫聽雨第二圖

又作巴山悵望情西牕重見寫圖成
幰櫳蕭瑟還今夕點滴分明是古聲
長枕乍安同把卷一犁曾約早歸耕
天教仲氏爲霖遍鳩喚良苗夜夜生

靈谷寺

三茅君策山靈走虎踞龍盤作鍾阜
疲龍困虎幾變更蒲牢猶發蕭梁聲
空山積雪殘西嶺日暮寒泉誌公井鑿泉
陟嶺山路遙石旛影落松筠高登壇坐階看修竹
四山振響風蕭騷皇覺寺中聖人出誌公不能安石室道林七級

起浮圖移來朽骨添燈漆當時道子爲寫真誰歟贊者謫
仙人平原之書妙入神豈知殘碑苔蘚碧眼前何處非迷
津石獸蒼涼孝陵道銅駝泣露埋荒草屯兵指點斜陽明
鷄鳴寺是古臺城

臘月十六夜宿避風館五更起看江

圓月墮江水空濛乍吐吞鐘聲連上界海氣浴朝暎逮曉
渾無迹瞻東似有門潤州千萬戶鷄唱夢猶溫

焦山鼎銘舊拓本

竹垞跋云王西樵拓之
焦山程處士穆倩釋文

鼎銘出焦山長蘆叟題識云是王西樵登山手拓寄程生
辨奇古九十有三字豈惟法物成周重二百年墨積嵐翠

枯木堂開江海渾初日照耀雲雷文山靈水怪屢窺瞰神
物未許凡夫捫王曰南仲嘉爾勲元衣縞鞞榮爾身呼史
冊命作尊鼎用享列祖寶子孫其中闕疑所誠有以格爲
如端爲友黃耳金鉉利用貞饗饗應圖亦云醜司徒世惠
名三見其三世字文小變或云廡惠是耶非安能起問程
穆倩

明鄭端清世子詩

有序

世子名載堉著述入本朝四庫全書父鄭恭王
諫大禮被囚世子橐籥請室及當襲國世子上書
以爲大宗有罪宜繼小宗卒讓之再從祖弟其明

禮意成父忠雖復近古何愧三代之英因賦焉

定陶立廟枉承祧極諫親藩大義昭美里效忠成曲孝延陵將讓愧中朝心希妙藥行賸遍手校遺編望古遙一例楊家名父子暮年南詔雨瀟瀟

題徐侯齋先生澗上草堂圖

徐山民待詔修祠
裝遺像手書成冊

春風到寒山香草澗中碧澗上唳孤鶴知有高士宅當年麥秀心苦節介於石縑素多畫稿城市無履迹中丞湯睢州三次事徵辟門外訪松筠人已踰垣匿臨終書數行愴惻念弱息平生兩知己託孤不可易次耕未面訣孤定叨卵翼三復茲數言神徃心不隔起家本忠孝非古隱淪敵

宜乎百餘年葺宇遽興役別支卽烝嘗弟子傳手澤展像
薦蘋藻共此梅花夕

過淮陰釣臺

人生垂釣是良圖杖劍功名隙過駒石面平添春水碧市
聲喧帶澤鴻呼沛公最忌王真假漂母寧論報有無飽挂
輕帆漫懷古西風斜照一城孤

竹柏樓詩爲袁壽階賦

瀟湘帝子淚成血色染蒼簣最高節共姜耿耿憂流波柏
舟之死矢靡他北風怒號百卉死竹柏不改青枝柯瘦竹
蕭蕭生筍苦柏幹撐天溜雨古百年門第胥江隈一樓高

與懷清伍不見春風隻燕來但聞秋月孤鴻度樹萱歲月
去堂堂高樓永閉皋魚傷嚴霜古雪經多少竹實如今養
鳳皇

遊虎邱

高阜闔閭墓中宵虎氣騰禪心叅水月霸業轉風燈孫武
叢祠關生公講席憑美人禁戰否頑石點頭能雙劍清池
化孤雲寶塔升看山青眼客送茗紫衣僧終日香成霧千
年樹有稜祖宗仁讓香士女冶遊仍畫舫窺穠李輕紈咏
泮水誰知木蘭院寒對玉千層

抱孫二首

令節春將半何緣汝遽生最娛曾祖父謂是好星精客譽
仁謦趾來聽小鶴聲笑他纔墮地便擬作公卿

官閣百花放重闌掌弄珠古稱君子抱毋作小人儒詒汝
惟清白流民有畫圖災年多鬻子牧養愧吾徒

題胡茂甫同年

森

間遊草後次韓桂舫侍郎韻

澄潭翻暮景元洞答空響入手冰雪文清夢山泉賞福唐

好巖岫曾着屐幾兩歐冶鑿地荒

歐冶子鑄劍處在福州城外

旗鼓山

名極天仰丹砂葛洪心紫霞靈運想地僻游乃勝情悅技

屢痒至今筆淋漓恍見雲蒼莽蘇驚瀧九磨杜訝潭萬丈
交君靳隨驂引我船得槩猶記少年場樂聽鈞天廣百里

試聞歌廿年一鼓掌武夷君見招扶筇可容儻

清夫寄至新茶

新茶摘向白雲間第一聲雷九曲灣分得君謨風味在銜

孟先話武夷山

寒燈課子圖爲陶生本忠賦

吳白庵有詩紀事特詳

朝坐六一堂緬懷六一翁秋畫本母教盛業傳無窮有客
幅巾謁出卷讀未終賢母昔陶嬰令子今終童我友吳白
庵集蓼及幼冲其言有感觸述母義可風夫天廉吏後姑
亡身熒熒大歸抱螟蛉觀者乘垣墉署券當畫押母請真
書充大書字曰陶滿堂爲改容不識一忠字愧彼許敬宗

秋宵燈焰青夏夜燈花紅青紅感時節孤燈寒則同母也
哭聲隱兒之書聲洪纍纍如貫珠遙應百八鐘幾時纖鱗
飛上禹門爲龍白庵母雙節父亦官湘中題詩特沈痛謂
以教本忠本忠貢成均辦香師南豐曾谷都轉曾氏大母節節
苦報亦隆麻姑山峩峩盱江水淙淙水清能見底山高白
雲重媵以從姑秀削立玉女峯吾交兩三人母皆靈所鍾
子本豫章材努力明德崇瀧岡表魏國宜及親存封

題武林復園詩冊

杭堇浦厲樊榭諸公唱和之作內一詩山舟侍講
幼時爲其世父書之今年九十矣

紅橋燕飲落成詩此地今人或不知惟有白頭梁侍講操觚曾記少年時

梁溪唐孝女詩

孝女居錫山下工畫父老無子遂不嫁資筆墨以養生送死焉今年七十一 詔旌其門

女貞傍靈椿儼然喬與梓白華承絳趺藹然甘與旨至愛采蘋繁空花寫桃李曹娥木蘭節千古同一軌松泉清聽餘我親炙研几七十筆無停食恥不出已爲言棠梨開寒食墓田美何必譚淵元孺慕以沒齒東林有名儒南齊有孝子再拜謝山靈愧飲二泉水

南劍州詩贈董樵雲同年

廣善

用蔡忠惠延平閣韻

蒼山走東海影落扶桑赭峯矗淵乃澄雙龍滙其下石骨
激濤飛風威挾雲瀉一篇敵萬牛卸帆勒奔馬郡治出山
半春樹鱗鱗瓦至今頌神君庶彙藉陶冶賤子忝同薦對
策希董賈各辭金門直分疆一麾把何期廣陵城花前動
盃聳君方馳驂騶爐煙袖重惹恍合劍南津仍空薊北野
願爾垂天雲吸水江河灑

時方望雨

題明沈小霞梅花卷次韻

小霞名襄曾稽人爲錦衣衛經歷沈忠愍公之子白

父寬蔭官至黃州知府

噫嘻忠愍之禍烈其子黃州亦人傑託命朱家聲暗吞頓

首秦庭淚成血父先椒山疏十罪褫權奸魄剛勝鐵縛草
攢射檜與嵩挫辱百回不能折父忠子孝理則然訟寃誅
黨肝腸熱平生抑鬱寄於畫枯梅重生鬪雪月但覺凌寒
萬古香邨知三五有圓闕此詩此畫鬼神護傳之無窮表
貞潔

六月廿一歐陽文忠公生日祀之於平山堂

浮屠了學今知白招客荷花作生日荷花十里香年年曾
見醉翁湖上眠邗溝水碧蜀岡翠隔江山列如螺髻沈遵
能奏琵琶聲醉翁自得山水意翁生韓范富同朝清歌酣
讌翁之遭兩傷謠詠終覆露晚年引退緣青苗東坡一蹶

不復起可憐亦自青苗始我從惠州

詔量移曾與坡仙結鄰里白髮門生感故知成清風賢守

今謳思聖俞子美盛豪翰

謂同游諸君

獨慙無補昇平時生朝

亦記黃文節六月明淮海交情我能說溪毛更擬祀東坡臘

雪梅花伴清絕

題吳巢松吉士

慈鶴

蘭鯨集後二首

闕殿翹雲海日開鳳皇聲出九成臺一從上客觀周樂南
國如今季子才

春洲芳草海門潮氣勢難於氣味饒誰識少年憂萬古怨
能魄動喜魂銷

洪稚存至自武夷極言其勝

客言武夷勝靜聽悟畫理九曲腸胃清妙得驟雨洗嵌空
動蠕蠕白雲起山趾玉女藉英輝百峯同一美須臾好風
來散作江渺瀰東凹貯深翠西凸聳纖紫溜黃納茶稅聞
客亦倒屣求書意良殷有酒頗歎旨感子行役情山泉滿
吾耳行將謝簪紱襍被返田里

題明孫節愍公遺書後

節愍名臨桐城人爲揚龍友監軍同盡節於仙霞嶺

朝廷不用劉宗周金甌失守銅駝愁南都不用史可法黃
左交猜馬阮狎相臣姻婭鎮京口

神策軍來棄繻走倉皇蘭足江郎山一死已蓋平生醜貴

筑安能遽死忠爲有監軍孫武公各留寶墨本合傳再遷

朽骨還同封

孫氏子孫併收龍友遺骸葬於桐城香樹嶺

君不見皖城起事金

忠毅

正希生

當時並命江天一石齋殉國三人從就中記得

毛玉潔吾生獨惜錢謙益愧負陶庵爲上客吁嗟國事不可爲死乃庸行毋足奇

盛朝亦表范公節誰佐之者留山嵇

閔雨行

小麥欲枯大麥休閔雨與民同其憂蒿目南東將理畝寄愁西北慵登樓扶攜老幼歸鄉縣邠識歸來淚如霰大田龜坼牛晝眠羨煞銜泥舊巢燕一歲雄鷄三歲豷坎其擊

鼓西日斜嗇夫作使童男女枉在江都讀繁露吏爲不德
祝矯誣災宜及吏民何辜頻年大水鄰境熟今聞旱遍齊
楚吳

淮南襍詩

小闌婪尾廣陵春舊雨來時鵲語頻一自魏公開讌後未
妨贈藥繼風人

半江雲水澹於秋不算淮南上巳遊明月二分才八斗幾
人扶醉十三樓

草綠康山石逕斜春風仍到狀元家低垂銀蒜燒銀燭一

曲涼州聽琵琶

上聲琵琶聲

留春草堂詩鈔

卷四

毛

董公祠外樹蓁蓁居士坊中佛一龕至竟熟精文選理曹

家樓直阮家南

梁曹憲文選樓故址在舊城今芸臺中丞居之

丞相祠堂傍水涯尋春士女日誼譁嶺南香雪無消息嶺

北寒梅未肯花

蜀阜晨嵐白似綿邛溝春水碧於煙紅橋無恙吾生晚不

及漁洋司

去聲理年

瓦窑一角障斜陽清磬遙知出上方

上方寺卽古竹西

搜得琉璃

王芻石不須青草弔雷塘

芸臺中丞於甘泉山獲西漢石俗稱琉璃王冢斷爲劉厲之訛

乃淮南厲王冢石

一聲柔橈劃江煙載得琴書薄醉眠十里銀燈檀板郡曉

看甕社孕珠圓

城西載酒裕園來

故檢討夏醴谷先生別業在高郵城西

異藥金釵石斛開

淮海芳情未消歇春風吹上文遊臺

露筋祠下畫橈停催換歸鞍尙戴星待轉茱萸灣上路隔江山入馬頭青

洲上人家半水仙曉風微拂嫩寒天怪來青蓋霏紅雨千樹桃花一逕穿

酒帘籬落近黃昏種菊如農處處園畢竟宜師彭澤令晚香秋影傍花邨